

摘藻堂四庫全書薈要

集部

欽定四庫全書薈要卷一萬八千四百二

集部

御選金詩卷十六

七言律詩六

元好問

咏懷

涼葉蕭蕭散雨聲  
虛堂淅淅掩霜清  
黃花自與西風約  
白髮先從遠客生  
吟似候蟲秋更苦  
夢和寒鵲夜頻驚  
何時石嶺關頭路  
一望家山眼暫明

帝城

史院夜  
直作

帝城西下望孤雲，半廢晨昏媿此身。  
世俗但知從仕樂，書生只合在家貧。  
悠悠未了三千牘，碌碌翻隨十九人。  
預遣兒書報歸日，安排雞黍約比鄰。

僕射陂醉歸即事

多生曾得江湖樂，每見陂塘覺眼明。  
詩酒共尋前日約，風陰新自夜來晴。  
春波澹澹沙鷗沒，野色荒荒煙樹平。  
醉踏扁舟浩歌起，不須紅袖出重城。

是日招樂  
府不至

春日

里社春盤巧欲爭，裁紅暈碧助春情。  
忽驚此日仍為客，却想當年似隔生。  
貧裏蘼鹽憐節物，亂來歌吹失懽聲。  
南州剩有還鄉伴，戎馬何時道路清。

歐陽詹春盤賦裁紅暈碧巧助春情

為韻

橫波亭為青口帥賦

孤亭突兀插飛流，氣壓元龍百尺樓。  
萬里風濤接瀛海，千年豪傑壯山丘。  
疎星澹月魚龍夜，老木清霜鴻鴈秋。

倚劒長歌一杯酒浮雲西北是神州

野菊座主閒閒公命作

柴桑人去已千年細菊班班也自圓  
共愛鮮明照秋色爭教狼籍卧疎煙  
荒畦斷壟新霜後瘦蝶寒蟬晚景前  
只恐春叢笑遲暮題詩端為發幽妍

昆陽二首

古木荒煙集暮鴉高城落日隱悲笳  
并州倦客初投迹楚澤寒梅又過花  
滿眼旌旗驚世路閉門風雪羨山家

忘憂只有清尊在，暫為紅塵拂鬢華。

去日黃花半未開，南來忽復見寒梅。  
淹留歲月無餘物，料理塵埃有此杯。  
老馬長途良憊矣，白鷗春水亦悠哉。  
商餘說有滄洲趣，早晚乾坤入釣臺。

葉縣雨中

時崧前  
旱尤甚

春旱連延入麥秋，今朝一雨散千憂。  
龍公有力迴枯槁，客子何心歎滯留。  
多稼即看連楚澤，歸雲應亦到崧丘。  
兵塵浩蕩乾坤滿，未厭明河拂地流。

潁亭

潁上風煙天地迴  
潁亭孤賞亦悠哉  
春風碧水雙鷗靜  
落日青山萬馬來  
勝槩銷沉幾今昔  
中年登覽足悲哀  
遠遊擬續騷人賦  
所惜忽忽無酒杯

山中寒食

小雨班班浥曙煙  
平林簇簇點晴川  
清明寒食連三月  
潁水崧山又一年  
樂事漸隨花共減  
歸心長與鴈相先  
平生最有登臨興  
百感中來只慨然

楚漢戰處

虎擲龍拏不兩存當年曾此賭乾坤一時豪傑多行陣  
萬古山河自辟門原野猶應厭膏血風雲長遣動心魂  
成名豎子知誰謂擬喚狂生與細論

後灣別業

薄雲晴日爛烘春高柳清風便可人一飽本無華屋念  
百年今見老農身童童翠蓋桑初合濫濫蒼波麥已勻  
便與溪塘作盟約不應重遣濯纓塵



寄欽用

顛顚京華首着盤  
南山歸興夜漫漫  
長門有賦人誰買  
坐榻無氈客亦寒  
蟲臂偶然煩造物  
麀頭何者亦求官  
故人東望應相笑  
世路羊腸乃爾難

內鄉縣齋書事

吏散公庭夜已分  
寸心牢落百憂熏  
催科無政堪書考  
出粟何人與佐軍  
飢鼠遶牀如欲語  
驚鳥啼月不堪聞  
扁舟未得滄浪去  
慚愧春陵老使君

遠祖次山春陵行云思欲委符節引

竿自刺船故子美有  
興含滄浪清之句

被檄夜赴鄧州幕府

幕府文書鳥羽輕  
敝裘羸馬月三更  
未能免俗私自笑  
豈不懷歸官有程  
十里陂塘春鴨鬧  
一川桑柘晚煙平  
此生只合田間老  
誰遣春官識姓名

除夜

一燈明暗夜如何  
夢寐衡門在澗阿  
物外煙霞玉華遠  
花時車馬洛陽多  
折腰真有陶潛興  
扣角空傳甯戚歌

三十七年今日過可憐出處兩蹉跎

劉光甫內鄉新居

廬冠平日凜秋霜老去聲名只閉藏  
父老漸來同保社兒童久已愛文章  
蔬隨隙地皆成圃竹放新梢欲過牆  
為向長安舊遊道世間元有北窓涼

西齋夜宴

時為內鄉令

飄零無物慰天涯酒伴相逢飲倍加  
誤謬君當略彭澤迴旋我亦笑長沙  
金釵翠驪迎春髻銀燭光搖半夜花

只欠東山游錄事不來堅坐看紛譁

叔能信之張杜諸人皆在而麟之獨

不至

### 出山

松門石逕靜無闌布韞青鞵幾往還少日漫思為世用  
中年真欲伴僧閒塵埃長路仍回首升斗微官亦強顏  
休道西山不留客數峰如畫暮雲間

### 石門

兩崖懸絕倚山根草逕低迷劣可分潭影乍從明處見

竹香偏向靜中聞  
石林萬古不知暑  
茅屋四鄰惟有雲  
曳杖行歌羨樵叟  
此生何計得隨君

岐陽二首

突騎連營鳥不飛  
北風浩浩發陰機  
三秦形勝無今古  
千里傳聞果是非  
偃蹇鯨鯢人海涸  
分明蛇犬鐵山圍  
窮途老阮無奇策  
空望岐陽淚滿衣

百二關河草木橫  
十年戎馬暗秦京  
岐陽西望無來信  
隴水東流聞哭聲  
野蔓有情縈戰骨  
殘陽何意照空城

從誰細向蒼蒼問，爭遣蚩尤作五兵。

雨後丹鳳門登眺

絳闕遙天霽景開，金明高樹晚風迴。  
長虹下飲海欲竭，老鴈叫雲秋更哀。  
劫火有時歸變滅，神嵩何計得飛來。  
窮途自覺無多淚，莫傍殘陽望吹臺。

懷秋林別業

茅屋蕭蕭淅水濱，豈知身屬洛陽塵。  
一家風雪何年盡，二頃田園入夢頻。  
高樹有巢鳩笑拙，空牆無穴鼠嫌貧。

西南遙望腸堪斷自古虛名只誤人

喜李彥深過聊城

圍城十月鬼為鄰異縣相逢白髮新恨我不如南去鴈  
羨君獨是北歸人言詩匡鼎功名薄去國虞翻骨相屯  
老眼天公只如此窮途無用說悲辛

與張杜飲

故人寥落曉天星異縣相逢覺眼明世事且休論向日  
酒尊聊喜似承平山公倒載羣兒笑焦遂高談四座驚

轟醉春風一千日愁城從此不能兵

秋夕

小簟涼多睡思清一窗風雨送秋聲頻年但覺貂裘敝  
萬古何曾馬角生寄食且依嚴尹幕附書誰住鄧州城  
洗愁欲問東家酒恨殺寒雞不肯鳴

夢歸

顛顚南冠一楚囚歸心江漢日東流青山歷歷鄉園夢  
黃葉蕭蕭風雨秋貧裏有詩工作祟亂來無淚可供愁



殘年兄弟相逢在隨分蘼鹽萬事休

淮右

淮右城池幾處存宋州新事不堪論  
輔車謾欲通吳會突騎誰當擣薊門  
細水浮花歸別澗斷雲含雨入孤村  
空餘韓偓傷時語留與累臣一斷魂

乙未正月九日立春

十度新正九處家今年癡坐轉堪嗟  
一冬殘雪不肯盡連日苦寒殊未涯  
重碧總誇燕市酒小紅誰記上林花

殘魂零落今無幾  
乞與春風惱鬢華

三仙祠

三仙祠下往來頻  
顚顚征衫滿路塵  
簫鼓未休寒食酒  
樵蘇時見舊都人  
吹殘芳樹紅仍在  
展放平田綠已勻  
西北并州隔千里  
幾時還我故鄉春

送輔之仲庸還大梁

驛騶爭道渺翩翩  
誰遣風塵失壯年  
四壁舊聞懸磬宅  
一囊今有賣書錢  
淋浪別酒青燈夜  
滅沒孤帆落照邊

想得還家過春半故都喬木滿蒼煙

眼中

眼中時事益紛然擁被寒窗夜不眠  
骨肉他鄉各異縣衣冠今日是何年  
枯槐聚蟻無多地秋水鳴蛙自一天  
何處青山隔塵土一菴吾欲送華顛

鎮州與文舉百一飲

翁仲遺墟草棘秋蒼龍雙闕記神州  
只知終老歸唐土忽漫相逢是楚囚  
日月盡隨天北轉古今誰見海西流

眼中二老風流在一醉從教萬事休

衛州感事二首

神龍失水困蜉蝣一舸倉皇入宋州  
紫氣已沈牛斗夜白雲空望帝鄉  
秋劫前寶地三千界夢裏瓊枝十二樓  
欲就長河問遺事悠悠東注不還流

白塲亭亭古佛祠往年曾此走京師  
不知江令還家日何似湘纍去國時  
離合興亡遽如此淒淒零落竟安之  
太行千里青如染落日闌干有所思

望崧少二首

崧少飛來崑閬山山家茅屋翠微間雞豚鄉社相勞苦  
花木禪房時往還結習尚餘三宿戀殘年多負半生閒  
長河一葦人千里望斷西城碧玉環

飲鶴池邊萬木稠養龍崖上五峰秋藤垂絕壁雲添潤  
澗落哀湍雪共流田父占年驚玉旆詩仙留迹歎崑丘  
西風落日山陽道空對紅塵憶舊遊

飲鶴池在緱山養龍崖在五乳峯下

懷州子城晚望少室

河外青山展卧屏并州孤客倚高城十年舊隱拋何處  
一片傷心畫不成谷口暮雲知鄭重林梢殘照故分明  
洛陽見說兵猶滿半夜悲歌意未平

羊腸坂

浩蕩雲山直北看凌兢羸馬不勝鞍老來行路先愁遠  
貧裏辭家更覺難衣上風沙歎顛顚夢中燈火憶團圓  
憑誰為報東州信今在羊腸百八盤

野谷道中懷昭禪師

行行汾沁欲分疆  
漸喜人聲挾兩鄉  
野谷青山空自繞  
金城白堦已相望  
湯翻豆餅銀絲滑  
油點茶心雪蕊香  
說向阿師應被笑  
人生生處果難忘

外家南寺

在至孝社余兒時讀書處也

鬱鬱楸梧動晚烟  
一庭風露覺秋偏  
眼中高岸移深谷  
愁裏殘陽更亂蟬  
去國衣冠有今日  
外家梨栗記當年  
白頭來往人間徧  
依舊僧窓借榻眠

官園探梅同康顯之賦

柳麥榆椒寂莫邊儘饒梅事得春偏留殘瘦骨猶堪畫  
未展幽香已可憐千里移根自何許數枝臨水記當年  
開時重約花前醉試手東風第一篇

再到新衛

蝗旱相仍歲已荒伶俜十口值還鄉空令姓字喧時輩  
不救飢寒趨路傍行帳馬嘶塵瀕洞空村人去雨淋浪  
河平千里筋骸盡更欲驅車上太行

別冠氏諸人



東舍茶渾酒味新  
西城紅豔杏園春  
衣冠會集今為盛  
里社追隨分更親  
分手共傷千里別  
低眉常媿六年貧  
他時細數平原客  
看到還鄉第幾人

杏花

芳樹春融絳蠟凝  
春風寂莫掩柴荆  
畫眉盧女嬌無奈  
齟齬孫娘笑不成  
已怕宿粧添蝶粉  
更堪暖蕊鬧蜂聲  
一般疎影黃昏月  
獨愛寒梅恐未平

賦南中楊生玉泉墨

墨不用松煙  
而用燈煤

萬竈元珠一唾輕客卿新以玉泉名御團更覺香為累  
冷劑休誇漆點成浣袖秦郎無藉在畫眉張遇可憐生  
晴窗弄筆人今老孤負松風入硯聲

宮中以張遇麝香  
小團為畫眉墨

### 赤石谷

林罅陰崖霧杳冥石根寒溜玉玎玲雲來朔漠疑秋早  
山近清涼覺地靈靜愛鳥聲存野調鬧嫌人迹帶塵腥  
南臺說有金銀氣可是并汾處士星

繫舟山僧徒謂之  
小五臺九月中時

有景星  
如佛光

灑亭同麻知幾賦

零落棲遲復此遊一尊聊得散羈愁  
天圍平野莽無際水繞孤城閑不流  
柳意漸迴淮浦暖雁聲仍帶塞門秋  
登高望遠令人起欲買煙波無釣舟

過應州

平野風埃接戍樓邊城三月似窮秋  
人家土屋纔容膝驛路旂車不斷頭  
隨俗未甘嘗馬湏敵寒直欲御羊裘  
十年紫禁煙花繞此日雲山是應州

感興

夜宿讀書山作

倚梯從昔望煙霄七葉何人竟珥貂  
道路常教車歷鹿功名唯有鬢飄蕭  
勤如韓子初無補晚似馮公豈見招  
五十三年等閒裏一窓風葉雨瀟瀟

送周帥夢卿之關中

狼籍麻衣見酒痕憶君醉別柳邊村  
離愁擾擾理還亂來事悠悠誰與論  
瘴海漸添春浪濶冰崖惟覺草煙屯  
人間底似三峰好箭筈通天有一門

十二月二十日雪中過石嶺關

老天黯慘入平蕪  
朔吹崩奔萬竅呼  
雪意旋糝行路景  
詩家新有入關圖  
地爐圍坐慚田父  
絮帽衝寒怨僕夫  
故國煙花重回首  
蜀橙山麝記金壺

甲辰三月旦日以後雜詩二首

澌澌猩紅鬧曉晴  
攢頭真似與春爭  
舒開楊柳聊相映  
瘦殺寒梅枉自清  
粉豔低回工作態  
絳脣寂莫獨含情  
畫圖只愛殘妝好  
未信徐郎解寫生

密霧輕塵細灑勻綠雲紅雪一番新風光爛漫供歡席  
酒味清醇似主人落落湖山如有喜欣欣魚鳥亦相親  
新詩寫入奚奴錦從此他鄉不算春

紫牡丹

夢裏華胥失玉京小闌春事自昇平只緣造物偏留意  
須信凡花浪得名蜀錦浪淘添色重御爐風細覺香清  
金刀一剪腸堪斷綠鬢劉郎半白生

洛陽

千年河嶽控喉襟一日神州見陸沉已為操琴感哀涕  
更須同輦夢秋衾城頭大匠論蒸土地底中郎待摸金  
擬就天公問翻復蒿萊丹碧果何心

為鄧人作詩

再見州人本不期相留相挽忍相違攜盤渭水空流涕  
種柳金陵已合圍事去恍疑春夢過眼明還似故鄉歸  
題詩未要題名字今是中原一布衣

贈張主簿偉

江岸墳荒草棘秋  
朱陽南下重君憂  
弓刀近塞人煙少  
林壑經霜虎跡稠  
究竟畏途知有漸  
激昂高義報無繇  
從今弟妹通家了  
莫向瓜田認故侯

寄劉繼先

清霜茅屋耿無眠  
坐憶分攜一慨然  
楚客登臨動歸興  
謝公哀樂感中年  
淒涼古驛人煙外  
迤邐荒山雪意邊  
千樹春風水楊柳  
待君同繫晉溪船

寄荅商孟卿



窈窕朱絃寂寞心得詩何啻得黃金冷猿掛夢山月暝  
老鴈叫羣江渚深異縣五年仍隔閣荒城連日想登臨  
書來且只平安了撥觸離愁恐不禁

別州卿弟

晚歲論詩辱見收相從許久重相留苦心亦有孟東野  
真賞誰如高蜀州萬疊寒雲度歸鴈孤洲春水澹沙鷗  
荒城後日思君處風色蕭蕭人白頭

東園晚眺

霜鬢蕭蕭試鑷看怪來歌酒百無歡舊家人物今誰在  
清鏡功名歲又殘楊柳攬春出新意小梅留雪弄餘寒  
一詩不盡登臨興落日東園獨倚闌

十一月五日暫往西張

城隈細路入沙汀絮帽衝風日再經歲歉村虛更荒惡  
窮冬人影亦伶俜林煙漠漠鴉邊暗山骨稜稜雪外青  
四十年來此寒苦凍吟猶記隴關亭

石嶺關書所見

軋軋旃車轉石槽故關猶復戍弓刀連營突騎紅塵暗  
微服行人細路高已化蟲沙休自歎厭逢豹虎欲安逃  
青雲玉立三千丈元只東山意氣豪

七月十二日行狼牙嶺

狼牙路滑馬伶俜老鶴超超欲上征一曲松風寫幽致  
九秋雲物愴離情天開負嶠方壺境澗落銀河月窟聲  
覲面青山入渠手定誰胸次玉崢嶸

汴梁除夜

六街歌鼓待晨鐘  
四壁寒齋只病翁  
鬢雪得年應更白  
燈花何喜也能紅  
養生有論人空老  
祖道無詩鬼亦窮  
數日西園看車馬  
一番桃李又春風

贈李春卿

竇十郎家指顧間  
因君我亦愛西山  
丹房藥境平生了  
禪榻茶煙歲月閒  
春壘有情供白隴  
秋風無力損紅顏  
重來已有明年約  
剩破都城幾往還

龍興寺閣

全趙堂堂入望寬  
九層飛觀儘高寒  
空聞赤幟疑軍壘  
真見金人泣露盤  
桑海幾經塵劫壞  
江山獨恨酒腸乾  
詩家總道登臨好  
試就遺臺老樹看

聽姨女喬夫人鼓風入松

白雪朱絃一再行  
春風纖指十三星  
雲窗霧閣有今夕  
寶靨羅裙無此聲  
蕭灑寒松度虛籟  
悠揚飛絮攪青冥  
胎仙不比湘靈瑟  
五字錢郎莫漫驚

寒食

壬子清  
明後作

上苑春風盛物華  
天津雲錦赤城霞  
輕舟矮馬追隨遠  
翠幕青旗笑語譁  
化國樓臺隔瀛海  
吳兒洲渚記仙家  
山齋此日腸堪斷  
寂莫銅瓶對杏花

送樊順之

弓刀十驛岳蓮州  
渭水秦山得意秋  
王粲從軍正年少  
庾郎入幕更風流  
寒鄉況味真雞肋  
清鏡功名屬虎頭  
寄謝溪風亭上月  
老夫乘興欲西游

過寂通菴別陳丈

并序

陳丈未識某而愛其詩曾對高御史士美言我他  
日見遺山當快飲百醉後見之而公已病乃相約  
易百醉為百杯每見以酒籌計之至七八十杯復  
有此別故詩中及之

甲辰秋

心遠繇來地自偏不離城市得林泉從教上界多官府  
且放閑身作地仙三月有期何敢負百杯未滿會須填  
違離更覺從公晚却望都門一慨然

丁未寒食歸自三泉

春山晴暖紫生煙山下分流百汊泉未放小桃裝野景  
已看茅屋映秋千飢烏得食爭相喚醉叟行歌只自顛  
寒食明年定何計故人尊酒且流連

送李同年德之歸洛西

亡奈流光冉冉何逢君聊得慰蹉跎飛黃老去空奇骨  
社燕歸來只舊窠舉世盡從愁裏過一尊獨愛醉時歌  
洛中定有人相問休道今年白髮多

存沒

辛老敬之  
劉兄景元



行間楊趙提衡早老去辛劉入夢頻案上酒杯聊自慰  
袖中詩卷欲誰親兩都秋色皆喬木一代名家不數人  
汲冢遺編要完補可能虛負百年身

人曰有懷愚齋張兄緯文

書來聊得慰懷思清鏡平明見白髭明月高樓燕市酒  
梅花人日草堂詩風光流轉何多態兒女青紅又一時  
澗底孤松二千尺殷勤留看歲寒枝

張村杏花

丁巳三月初二日

昨日櫻桃絳蠟痕  
今朝紅袖已迎門  
只應芳樹知人意  
留著殘粧伴酒尊  
濃李尚須羞粉豔  
寒梅空自怨黃昏  
詩家元白無今古  
從此張村即趙村

送奉先從軍

潦倒書生百戰場  
功名都屬繡衣郎  
虎頭食肉無不可  
鼠目求官空自忙  
卷月清笳渭城曉  
倚天長劍蜀山蒼  
習池老去風流減  
醉後揚鞭媿葛疆

贈玉峯魏文邦彥

夢想南山掩靄間  
眼明驚見玉峰寒  
風波舊憶橫身過  
世事今歸袖手看  
販婦庸兒識名姓  
故鄉遺族見衣冠  
臨流卜築平生事  
會就遼東管幼安

鬱鬱

鬱鬱羈懷不易開  
更堪寥落動淒哀  
華胥夢破青山在  
梁甫吟成白髮催  
秋意漸隨林影薄  
曉寒都逐鴈聲來  
并州舊日風聲惡  
悵望鄉書早晚回

秋日載酒光武廟

美酒良辰邂逅同  
赤眉城北漢王宮  
百年星斗歸天上  
萬古旌旗在眼中  
草木漸隨秋氣老  
河山長為昔人雄  
一杯選醉風雲地  
莫放銀盤上海東

丙辰九月二十六日挈家遊龍泉

風色澄鮮稱野情  
居僧聞客喜相迎  
藤垂石磴雲添潤  
泉漱山根玉有聲  
庭樹老於臨濟寺  
霜林渾是漢家營  
明年此日知何處  
莫惜題詩記姓名

茗飲

宿醒未破厭觥船紫笋分封入曉煎槐火石泉寒食後  
鬢絲禪榻落花前一甌春露香能永萬里清風意已便  
邂逅華胥猶可到蓬萊未擬問羣仙

杜仁傑

病中呈裕之

十載猶能復笑語歸來重覓讀書龕耒陽白酒君應具  
勾漏丹砂我自慚民訟幾何消自苦山城雖小得窮探  
也知清儉難持久好趁秋風醉菊潭

自遣

少日襟懷悔自豪暮年志節詎須高敢將議論輕疑孟  
閒得工夫細和陶酒盡枯腸還磊砢詩成白髮轉刁騷  
皇天汲汲誠何意也共人生一體勞

畚築家園手自操雖無多累足償勞十年種竹翻嫌密  
一日栽松恨不高是處求田消二頃尚誰有夢到三刀  
得名身後良癡計盡擬浮沉付濁醪

讀前史偶書

楊彪不著鹿皮冠元亮還書甲子年此去亂離何日定  
向來名節幾人全中原消息蒼茫外故里山河涕淚邊  
六國帝秦天暫醉魯連休死海東壖

解嘲呈元明府

江氣冥冥江雨飛潛夫四月著冬衣野荼蘼謝薔薇發  
山鷓鴣啼杜宇歸青鬢漸隨愁共減素心長與慢相違  
四方餬口非君事自識飄零有是非

麻革

晚步張輦田間

地入荒蕪過客稀  
村深門巷暮山圍  
悠悠獨鳥穿雲下  
策策寒烏掠日飛  
人事百年梧葉老  
秋風萬里稻花肥  
兵塵河朔迷歸路  
惆悵平沙送夕暉

板橋道中

篁竹蕭蕭野水濱  
光風過眼與時新  
陰崖積雪猶含凍  
遠樹浮煙已帶春  
世古未應悲故道  
歲華聊得伴閒身  
巖芽筍稚行當好  
莫擬山中問主人



過陝

萬古茅津據上游  
崑函西去接秦頭  
悲風鼓角重城暮  
落日關河百戰秋  
形勝古來須上策  
塵埃歲晚只羈愁  
豺狼滿地荆榛合  
目斷中條是故丘

寄杜仲梁

塞上愁多雲易陰  
故人雖在鴈無音  
交情念子黃金重  
世故稽人白髮深  
芳草春風千里夢  
青燈夜雨兩鄉心  
岱宗入眼東南秀  
悵望雲山淚滿襟

寄元裕之

朔雲陰雪晚重重日入寒蕪塞草空  
沂水東回無去翼天山南斷有哀鴻  
三年遠別交情外一夜相思客夢中  
明日關河對雙淚祇將幽憤寄秋風

張宇

感懷

世路羊腸劇險艱天心應厭著儒冠  
老無子息休心易貧有交親託事難  
文字售人真滯貨廉平養已似閒官

義經讀罷無人會庭竹蕭森夜月寒

上巳日遊平湖

微風漠漠水增波  
禊事重修繼永和  
脆管當筵清似語  
扁舟爭岸疾如梭  
一時人物成高會  
千里雲山入浩歌  
日暮芝蘭無處覓  
野花汀草占春多

陳賡

送李長源

月下孤鴻枕上雞  
高城今日又分攜  
九秋雲氣峩陵底

萬里河聲砥柱西  
飲罷關山秋寂寂  
詩成風雨暮淒淒  
千金善保并州器  
要放崑崙入馬蹄

寄陝郡楊正卿

遷客形容國士心  
春風鶴髮不勝簪  
鍾儀去楚衣冠異  
王粲依劉歲月深  
歲晚艱危無短策  
酒酣悲壯動長吟  
遙聞蘭省楊夫子  
一紙書來抵萬金

寒食登臨晉西原廢寺

前朝廢寺枕山阿  
尚有摩雲宰堵坡  
故國已非唐日月

老僧猶指舊山河年來筋力登臨倦亂後心情感慨多  
石蘚荒碑碎文字他年更得幾摩挲

當年雲構倚天開一夕煙塵化劫灰佛閣丹青餘瓦礫  
禪房花木亦蒿萊春風萬里騷人怨落日千秋杜宇哀  
斷礎荒煙無限意一章詩律為誰裁

答楊煥然二首

梁苑當年記盛遊亂離南北恨遲留且教紅袖歌金縷  
莫對青山歎白頭人似贊皇遷蜀郡詩如子美到夔州

傳家況有元文在應使童烏繼纂修

獻賦當年覲紫宸羨君藻思獨超羣扶持吾道難尤力  
潤色斯文老更勤學濟天人寧有畔文如風水自成紋  
何時載酒清伊上奇字時來問子雲

清明後書懷

花氣薰人動竹齋貪春狂思若為裁蜂粘落絮飛還墜  
燕認新巢去復來亂後精魂猶夢境貧中風景剩詩才  
江山信美非吾土懷抱何時得好開

病後贈姚仲寬居士

寂寂柴關晝不開，虛簷獨步意徘徊。  
百年素業南柯夢，一寸丹心古鼎灰。  
野老相過聊問訊，溪禽近啄不驚猜。  
好奇誰是劉公子，肯為揚雄載酒來。

房皞

次韻寄王升卿

谷口人家十二家，家窓戶得晴嵐千章雲木秀而野。  
一脉流泉清且甘，徇俗到頭終是病。耽書自古不名貪。

作詩為問東溪友樽酒何時慙笑談

贈趙山甫

寇盜連年劇蝟毛一身無處可奔逃  
陳平自合西歸漢  
葛亮焉能北事曹  
嗟我命兼才共薄  
仰君名與德俱高  
幾時一笑滄浪畔  
右手持盃左手螯

憶新牆劉德淵

雲煙杳靄水微茫  
何處青山是岳陽  
白髮滿頭空自老  
黃塵兩腳為誰忙  
同盟污渚言猶在  
偕隱廬峰興未忘



近有倦遊詩數首西風吹不到新牆

段克已

五月二十三日夜分雨作涼風颯然木葉蕭瑟  
絕似往年七八月感時物之變不能為懷漫浪  
成詩聊以自適

雲壓虛檐黯不收雨聲飛妥碧山頭簾幃清徹三更夢  
枕簟涼生五月秋入夜悲風何淅瀝先時病葉已飈颼  
心非木石能無感喚起悠悠去國愁

寄仲堅漢臣二子

經春日日卧空廬門巷蕭條長者車一卷時看王湛易  
數行懶寄子公書風光少得如人意顏面從教與世疎  
閒健不來花下醉明年花發定何如

和家弟誠之社燕之作

膠膠世事久經諳肯著紅塵換翠嵐騏驎捕颺非所任  
干將補履豈能堪老無成事惟多懶少不如人何更貪  
花下一杯誰伴我清風明月便為三

欲歸誰不遣君歸却恨歸來事事違烽火未休家信少  
山川良是故人稀黃金入手還能散白雪盈頭不肯飛  
試問春愁多幾許長江滾滾日暉暉

紅梅用誠之弟韻

梅花香裏滿蒲團萬事人間總不干醉夢每憐春意淺  
詩魂長遶夜枝寒記曾上苑溪頭見又向前村雪裏看  
回首青鞵已如豆齒牙衰朽怯微酸

小梅初破月團團戲蝶游蜂未敢干醉臉不禁輕宿雨

芳心似欲訴朝寒乍驚別後容華換更與尊前仔細看  
便好栽培近東閣免教風味一生酸

讀張志和傳

一葉輕舟一釣綸朝廷無處覓元真太虛明月為知己  
細雨斜風不著人西塞貪看飛白鷺東華忘却軟紅塵  
還思擾擾馳名者肯信人間有逸民

段成已

跋秦得真墨

晴窗不用辨犀紋墨妙秦郎已飫聞翠餅瑩如鴉背淨  
玉圖香鄙麝臍薰永寧賜弟今猶少易水無良古亦云  
老我媿非揮翰手兩丸投贈負伊勤

總管李侯移鎮京兆病久不能即門屏奉卮酒  
一賀為歉謹作拙惡以餞行軒

一札飛書下日邊龍移方伯殿長安晉城父老心皆泣  
秦地奸豪膽已寒千里馳驅容驥展九霄空濶看鵬搏  
十年潦倒登門客卧病無由挽去鞍

伯和告別北邁欲得一言以資行橐悵悵之意  
蓋不能違也病卧中殊無好懷漫此以贈

聽唱離歌一再行翩翩裘馬戒晨征據鞍耿耿壯夫志  
去國遲遲遊子情野店人稀休奠枕山蹊路險莫貪程  
一鞭行色西風順萬里秋空片鷲橫

送婁郎中秀實北上

氣壓元龍百尺樓搏空鵬鷃政高秋珥貂自屬封侯相  
借箸咸推決勝籌會計不勞談笑了功名未肯等閒休

并州豪俠風流在慚著儒冠謾白頭

送總管李侯北上

姓名合上郭公臺落落襟懷間世才飛騎屢朝天上去  
好音時向日邊來中心都為明時盡東閣常因好客開  
萬里鵬程從此始垂天雲翼看徘徊

辛丑清明後三日詩社諸君燕集於封仲堅別墅  
談笑竟日賓主樂甚然以未得吾兄弟數語為不足  
既而遯菴兄有詩余獨未也主人責負

不已因賦此應命云

善惡人情已飽諳  
岸紗晏坐看晴嵐  
折腰不是淵明嬾  
作吏元非叔夜堪  
老去一觴猶有味  
病來萬事更何貪  
從頭悉讀行年記  
慚媿春風四十三

紅梅

誰點冰梢絳雪團  
黃昏和月倚闌干  
羞隨桃李爭春意  
要伴松筠傲歲寒  
冷豔只宜閒處著  
淺妝難入俗人看  
天心固惜和羹便  
空抱枝頭一點酸



送仲堅漢臣二子過南澗歸賦是詩

螻蟻微生脫怒濤一茅容膝儘逍遙宦情更比詩情薄  
日力聊憑酒力消心類候蟲寒更切鬢隨霜葉病先凋  
兒童失笑翁慵甚送客今朝却過橋

寒食後有感而作

二月山城尚薄寒冬衣未解歎衰殘賞心更比年時減  
酒量全非舊日寬點點花隨春共老悠悠詩與夢俱闌  
此身只合山間了勛業何勞鏡裏看

薄命書生不足論  
春來顚顚寄荒村  
花間也作南華夢  
眼底還無北海尊  
風掠平波寒翦翦  
雲拖殘雨晝昏昏  
興來偶逐歸禽返  
燈火人家半掩門

送史生仲恭北上

裘馬翩翩事遠遊  
少年豪舉氣橫秋  
愛君早有四方志  
為我能無一日留  
擊筑悲歌增感慨  
倒瓶濁酒浣離憂  
他時相憶勞回首  
何處風沙認晉州

仲堅將別去成行之夕會飲於史氏之山齋

得子膠膠擾擾間往來未熟各衰顏百年更有幾回醉  
一月都無數日間不放肝腸中白隋將何面目對青山  
相逢且盡今宵樂明日紅塵復市寰

用韻荅封張二子

心如隋絮已霑泥身似驚禽未得棲壺缺何煩歌老驥  
冠成不復帶雄雞黃公遁跡終辭漢范蠡逃名竟入齊  
回首平生事堪笑少年豪氣北山低

中秋之夕封生仲堅衛生行之攜酒與詩見過

各依韻以荅二首

萬籟聲沈暮靄收  
長河瀉浪洗清秋  
遙天千里澹如水  
明月一輪光滿樓  
隨意傾銀成勝賞  
誰家橫玉調新愁  
可憐白首蟾宮客  
羞對嫦娥說舊遊

夜涼河漢靜無聲  
澄澈天開萬里晴  
蟾吐寒光呈皎潔  
桂排疎影甚分明  
良宵方喜故人共  
醉語那知鄰舍驚  
一片詩魂招不得  
九霄直與月俱清

翼日二子見和復用韻以荅

短髮蕭蕭散不收  
老來何意更悲秋  
常年有酒或無月  
今夕乘晴好上樓  
休對嬋娟談往事  
祇將笑語替清愁  
冷光願照金尊裏  
記得開元太白遊

戊申四月書於史氏仲恭別業

飄飄天地一癯儒  
問柳尋花未要扶  
老去生涯三徑在  
向來意氣一分無  
尊前乍喜紅潮頰  
鏡裏那知雪滿鬚  
睡起北窗成一笑  
人間歧路足崎嶇

午芹道中

渺渺江風吹葛衣  
愛閒常與世相違  
青絲步障柳千樹  
碧玉屏風山四圍  
入眼江花如慰意  
近人沙鳥信忘機  
虛名到此成何事  
一笑平生始覺非

元日夜與二三子小酌

一尊相對夜如何  
却恨歸來白髮多  
萬事到今從鹵莽  
一年好處莫蹉跎  
閒收暮景供清酌  
醉挽春風入浩歌  
多謝東君不嫌客  
也教衰朽得陽和

幽懷用夢菴張丈韻

此懷耿耿付東流蒲柳形骸不耐秋老去始知身世幻  
病來漸覺鬢絲稠青蠅點物驅還至白鳥猜人挽不留  
收拾閒愁供晚睡西風吹夢冷悠悠

百年過眼半羈旅十日逢人九歎嗟叔夜不堪常抱病  
馮驩何苦久無家飄零身世風頭絮澹薄人情春後花  
擬把餘生釣江海為煩嚴子借魚槎

起來乘霽看年華便著芒屨待鹿車白水明邊鎔落日  
碧天盡處散餘霞決明點檢無多實甘菊商量有數花

滿酌一杯都不計人間萬事足安蛇

蘭氏晚節軒

幾年會計屈微官五斗才堪給酒錢  
野鶴風標寒愈峭巖松節目老方堅  
石腸未省隨時轉鐵面何嘗與世妍  
回首風煙三徑晚典刑當作畫圖傳

都把升沉不置懷一尊時對好山開  
張公雅有江湖志崔子本非丞貳才  
為政從渠嗤拙宦買田已自賦歸來  
高情想像常如在不逐春風沒草萊



雨後漫成

羈思紛紛不易裁  
晚涼扶病獨登臺  
翩翩幽鳥避人去  
殷殷輕雷送雨來  
已判此身閒裏老  
且將笑口酒邊開  
安車待聘非吾事  
休作姑山隱逸猜

再和

涼月娟娟玉半裁  
曉風吹夢下瑤臺  
笛兼鄰杵相和切  
秋共羈愁一并來  
到處溪山容我嬾  
違時顏面向誰開  
少陵可笑行藏拙  
獨倚危樓剛自猜

總管隴西公自趙城以雪途行役見命賦此以獻

曉鞍催發五更鐘王事匆匆不易從雪氣空濛迷馬首  
霜威跋扈襲裘茸誰家村落雞頻唱到處園林鳥絕蹤  
却憶雲山舊栖地擁衾高卧養吾慵

萬夫長李侯西勤回作詩為賀

帷幄雍容擁萬夫雄襟英槩漢臧吳獠兒坐失重巖阻  
戰士爭先九折驅去日旌旗填蜀道歸時笳鼓競堯都

謬為門下登龍客擬頌勤勞愧腐儒

坐擁貔貅十萬夫雍容帷幄看投壺威風栗烈前無敵  
膽氣輪囷大滿軀銅柱直期標百粵連城潛覺失全吳  
江南公事行將畢願獻扁舟范蠡圖

曹之謙

寄元遺山

詩到夔州老更工只今人仰少陵翁自憐弈世通家舊  
不得論文一笑同草綠平原愁落日雁飛寒水怨秋風

黃金鑛裏相思淚幾隨憑欄北望中

秋日懷李仁卿

獨倚斜陽百尺樓故人千里思悠悠  
陶唐祠下煙光晚姑射峰前鴈影秋  
尊酒幾人同李白雲山多處是并州  
臨風惆悵無人會一曲商歌寫暮愁

送王仲通

從事西遊五見春翩翩書記日爭新  
懷鄉不作登樓賦佐府真為入幕賓  
世事忽驚翻手雨馬蹄又踏化衣塵

古來燕趙多豪傑，定有飛書薦鶚人。

上巳日感懷

舊游桃李浣丘塵，十六年悲客裏春。  
浮白可能澆魂魄，踏青聊且慰酸辛。  
蘭亭修契人何在，庾信傷心賦又新。  
芳草喚愁花濺淚，東風回首一霑巾。

白菊

數枝的皪照秋清，何物為花乃寧馨。  
玉骨冰肌誇皎潔，風瑤月珮想娉婷。  
霜迎葉上迷青女，露下籬邊泣素靈。

見說寒英能愈疾擬開三徑著茅亭

紅葉

枝上萎黃慘未乾嚴霜一夕總成丹  
色烘曉日燕脂暖影濯秋江蜀錦寒  
南鴈數聲催晚晚西風幾度見凋殘  
橫山樓下梨千樹每憶童年九日看

寄鄉中故人

十年夢繞故山薇世事悠悠與願違  
華表未成遼鶴語青冥空羨塞鴻歸  
雲橫北嶺迷鄉眼塵滿西風浣客衣

為報吾州舊新識  
短書相慰莫令稀

自趙城還府

簡子城邊過盡春  
却尋歸路並清汾  
落花亂逐溶溶水  
遠樹低連漠漠雲  
姑射雨晴山似染  
洞羊風暖草如薰  
獨憐疲俗誅求困  
愁歎聲多不可聞

讀唐詩鼓吹

傑句雄篇萃若林  
細看一一盡精深  
才高不似人間語  
吟苦定勞天外心  
白壁連城無少玷  
朱絃三歎有遺音

不經詩老遺山手誰解披沙揀得金

王嘉

煙霞洞

古洞無門掩碧砂四山空翠鎖煙霞天開玉樹三清府  
地湧金蓮七子家闡教客來傳道法遊仙人去換年華  
可憐此地今誰管春暖桃花自發花

譚處端

題洛陽朝元宮



宮門寂寂鎖祥煙古蹟靈蹤尚儼然  
雲罩連枝烹藥鼎霞生靈井溉丹泉  
日魂煉就華胥國月魄收將不夜天  
紫詔師真歸去後未知孰繼大羅仙

述懷

天機深遠少人知一粒刀圭午上持  
霧捲古潭秋靜夜雲收碧嶂月明時  
蛟龍縱得囚離鼎猛虎擒來鎖坎池  
煉就仙丹超造化去奔蓬島擅真師

離峰老人

寄郭菴主

浮生忽忽葉辭柯  
百歲光陰已半過  
塵外青山空悵望  
鬢邊白髮轉添多  
歲暮矣能無感  
君不歸兮可奈何  
我與沙鷗盟已定  
此回休更負煙波

行秀

迎駕

蓮宮特作內宮修  
聖境懽迎聖駕遊  
雨過水聲琴泛耳  
雲開山色錦蒙頭  
成湯狩野恢天網  
呂尚漁磯浸月鉤

試問風光甚時節黃金世界菊花秋

御選金詩卷十六

謹案卷十五第十頁前八行芙蓉城暖東風夜楊  
柳樓深笑語春刊本深作前據中州集改

第十二頁前七行魚蝦溪近得供盤刊本溪訛春  
據中州集改





總校官庶吉士臣侍朝

校對官檢討臣蕭九成

謄錄監生臣劉天蒼

欽定四庫全書薈要

集部

御選金詩卷十七

八

詳校官原任主事臣李斯咏



欽定四庫全書薈要卷一萬八千四百三

集部

御選金詩卷十七

五言長律

高士談

次韻東坡定州立春日詩

柳色看猶未梅花折已堪流年空客恨舊事與誰談落  
日窺愁絕東風半醉酣雲深歸曉鴈水暖浴春蠶從事  
終無愧空餐色有慙家山方杳杳官府謾覃覃隱几心





猶靜焚香鼻觀參語新憐鵲喜聲鄙惡鴟貪旅迹何時  
定歸心不厭南佳辰近燒燭盛事憶傳柑學業虛千卷  
生涯寄一菴誰能弔雙影無月不成三

吳激

雞林書事

箕子朝鮮僻蓬丘弱水寬儒風通百粵舊史記三韓邑  
聚居巢慣夷裝被髮安猶存古邊豆兼用漢衣冠兔穎  
家工縛鮭腥俗嗜餐騎兵腰玉具府衛挾金丸長袖鳬

窺肉都場狄掛竿琴中蔡氏弄指下祝家彈主禮分庭  
抗賓筵百拜難漬橙杭釀旨滋桂鹿脩乾潑墨松如節  
隕牆石似丹地偏先日出天迫衆山攢鵬翼風帆遠羊  
腸石磴盤由來異文軌休訝變暄寒事可資談柄誰能  
記筆端聊將詩貌取歸作畫圖看

劉著

次韻彥高即事

福威看九落筆削在麟經中道亡三鑑危時憶九齡網

羅無處避輦鼓不堪聽身遠遼陽渡心懷峴首亭脫巾  
頭半白傾蓋眼誰青斷鴈西風急潸然涕泗零

王濤

謁狄武襄公祠

傑古西河秀英雄挺偉姿奮身甘衛國弭節願匡時妙  
略風雲會威名草木知功高懾南服計重破西陲定亂  
勞三箭平戎在一麾勢傾銅柱遠聲振玉關奇頗牧才  
何濟孫吳譽並馳朝廷分重寄將相賴兼資豹略多全

勝鷹揚屢捷師雍容敦禮樂談笑屈蠻夷褒錫酬車服  
勲勞著鼎彝雲臺儼冠劍麟閣繪形儀錦里家仍在蘭  
陵塚不隳風號墳上木苔漬廟前碑過客煩詩句行人  
奉酒卮汾陽遺美蹟千古話芳規

王琢

辛未九月二十一日雪

幾日西郊霧連宵北牖風菊花猶汎酒雪片忽填空草  
樹秋容失河關曉氣濛聽初疑落葉仰不辨高鴻爛熳

三冬意憑凌百圃功披裘赴雞黍徑惜籬叢豈料元  
英巧來爭白帝雄剪裁渾草草飛舞太恩恩祇作干時  
令非關兆歲豐冬雷怪相似春電冷應同安得蛟龍蟄  
何由翳靄通日華升赤壁天色湛青銅尚有登臨興寧  
無賦詠工煙霞狂嘯傲一發醉顏紅

雨夕感寓

漠漠初燈後森森細點飄繁聲入遙夜冷簟恍秋宵起  
欲吟相和吁無客可招何曾洗兵馬但覺漏薪蕘雷電

初無預炎蒸遂不驕瀉檐鏘未歇欹枕兀無聊澗已山  
輸潦堤應水沒橋長林倦今夕孤鳥撼驚條似我纏憂  
戚因貧墮寂寥避人猶虺蜴擇宿等鷦鷯共世難曹禰  
無才匹管蕭苦心還自笑末俗本多囂未老愁推髻長  
飢帶贅腰沐寒少陵被飲陋子淵瓢射策初游漢潛山  
敢傲堯鹽車竟垂耳風鷁忌干霄一室元空埽千鍾豈  
易要芳蘭逼憔悴尺鷃失逍遙字對諸生識詩煩衆手  
凋搜求勞腎胃戛擊謝咸韶舊弄新絃掩窮途拙目搖

爭為壯夫篆只使古風澆血指甘時巧色羞愴道消優  
游能卒歲三四儘論朝故幔幽霖透長檠暗燼挑不辭  
牆出菌僮見穀抽苗饜飫貪夫腹翻騰樂歲謠晴樓交  
燕雀涼樹沸蟬蛭坐快虹蜺出憂無萍梗漂浩歌彌激  
烈興在海門潮

蕭貢

臨泉道中

半世事行役茲游初未經峽門迷白晝嶺脊上青冥澗

曲莓苔滑松盤霧雨溟登危人跼踏涉險馬矜竝落日  
留行客投鞭得驛亭短牆明積雪破屋漏疎星羌笛誰  
三弄羈懷強一聽葭蘆知不遠河外數峰青

趙秉文

柏人光武廟

真人開有漢帝業肇蕪蕪灑落君臣契艱危廟社圖山  
川扶鄘邑日月拱東都社稷千秋里風雲四達衢北風  
吹雨雪西日照桑榆舊物餘翁仲荒祠老祝巫功臣遺



像在時有鼠銜鬚

謁北嶽

四大神儀一羣山太茂尊奠方荒冀宅視禮配天孫西  
送虞淵暮東瞻碣石瞰寶符臨代郡鐵甕扼并門控趙  
襟形壯色燕氣象渾九河探禹跡萬里叫虞魂在昔登  
封始前驅羽衛繁千官駢部曲萬騎隘山樊卜地恒陽  
曲移祠泰始元晉移祠曲陽荒碑刻歲月飛石碣乾坤帝秩  
加黃屋宮居象紫垣雲楣朽芝瑞雨砌裂槐根天業恢

弘大山靈翊衛屯巫閭歸帝製長白發金源九廟龍盤  
接三邦地勢吞雲煙浮近甸日月遠中原歎謁天香重  
封題御署存銀鐻諸產富雷雨萬靈奔神聽羞回德天  
聰納正言負時身九死去國淚雙痕日近趨天闕生還  
託聖恩許身徒稷契無術補義軒帝錄長桑洞仙巖張  
果邨卜居如可近重整北山轅

胥鼎

送弟恒作州

男子四方志人生五馬榮君恩何以報民政不宜輕御  
物當存恕秉心要盡誠勿矜新號令姑守舊章程歛暴  
單貧困囚淹狡偽萌慈柔難禁暴苛急必傷生東郡吾  
將老西陲敵未平一生能幾別四事果難并方此對牀  
樂愴然分袂驚荒詩何足記聊寫弟兄情

高廷玉

柳絮

斷送春歸去紛飛不暫停和風三徑雪微雨一池萍蝶

惹依芳草蜂粘過小庭靜宜投隙地狂欲攪青冥得得  
穿朱戶時時撲翠屏黃鶯枝上語似與訴飄零

李純甫

贈高仲常

借問高書記南征又北征從軍元自樂遊子若為情筆  
下三千牘胸中百萬兵傷弓良小怯彈鋏竟何成慘淡  
風塵際悲涼鼓角聲別家四十日並塞兩三程斗絕牛  
皮嶺荒寒燕賜城吟邊白鳥沒醉裏暮雲橫感慙悲王

粲顛狂笑禰衡虎賁多將種底用兩書生

閻長言

婆速道中書事

此地先經戰人生苦未聊泉源疏地脉田壠上山腰敗  
石平危徑枯柴補短橋曉煙明遠爨暮雪暗歸樵履滑  
心頻悸梯危骨欲消解鞍空倒卧無夢託通宵

周馳

箸詩

章廟御題  
限紅字韻

矢束形何短籌分色盡紅駢頭斯効力失偶竟何功比  
數槃盂側經營指掌中蒸豚挑項鬻湯餅拌油蔥正使  
遭讒口何嘗廢直躬上前如許借猶足沃淵衷

張潛

寄人宰縣

縣務無難易人情自異同割雞良暫屈製錦要專工積  
弊姦賊後遺黎喘汗中不存憂世志底用讀書功嫉惡  
看平日知君有古風莫教循吏傳獨載魯山翁

元好問

懷益之兄

世故伊川歎鄉情越客音天宜他日定陸已向來沈冉  
冉愁看老源源事益侵誰言易排遣自分不勝任鞭影  
驚疲馬鍾聲急暮禽跼中無曠迹喧外有幽尋夢失名  
家筆書存遺子金山田和石瘦茅屋過雲深春雨疏成  
圃秋霜柿滿林樹陰涼拂席花氣澹盈襟宿鷺窺晨汲  
孤猿伴暝吟溪僧時問字野客或知琴抱璞休奇售臨

觴得緩斟阿兄團聚日曾語百年心

汴禪師自斲普照石為硯以詩見餉為和二首  
寺廢瓦不毀硯奇功亦多已知良斲少更奈苦心何挺  
挺剛無敵津津潤可呵羽陽陵谷變水井字書訛贈比  
黃金璞辭慙紫石歌遙知玉音在洗耳俟研磨

長吉有  
紫石硯

歌

點化鉛仍見堅凝鐵易穿何年埋朽壤此日睹青天古  
色秋煙重哀音夜雨懸有刀堪切玉是鏡不名甌佛廕



淪空劫書林結夜緣禪河一勺水更擬就師傳

癸巳除夕

鼎定周元重薪安漢已然不隨南渡馬虛泛北歸船身  
並枯蜩化心爭脫兔先塵埃嗟落泊光景強留連往事  
青燈裏浮生白髮前更殘鐘未動猶屬出京年

病中

病因食豬動氣而作癸卯  
四月二十一日晨起書

戰勝頗自恃寧知從外腴文章工作崇時運迫推枯止  
酒嗟何及燒豬本不圖膏粱無急變山澤有真臞詩信

藤條戲方遭鐵彈誣鹽

去聲

紅忘後顧鰲黑見前驅眩入

投牀卧晨淹伏枕呼萬錢惟嘔泄一嚮爾乘除靜伏心

仍悸深調息亦麤跼嫌囚宇宙渴憶卷江湖風柳留蟬

蛻霜松映鶴孤養和懲往失

几名養和事見天隨子詩

扶老念時須

杯杓歸神誓垣牆任佛踰回蹊且垂翅望或在桑榆

### 麻革

#### 上雲內帥賈君

北極長虹掣西垣太白高千年知運圯四海共兵鏖霧

黑龍蛇鬥山昏虎豹嘯石傷填海羽波動負山鼇遺介  
潛寒渚驚鼯走夜牢江山留慘黯天地入羣蒿衆折思  
支柱初寒俟繭繅明良逢慶會鄉曲得名豪梁棟因人  
出餘腥為世操安流欣鼓枻奔浪獨能篙日出戈揮景  
江翻弩射濤風聲連瀕洞裁鑒悉纖毫桃李勤封植茅  
菅日難薈獵場游麋鹿魚渚動鱖魴井邑生春色禾麻  
飫土膏民歌烏遶屋士喜馬騰槽朔塞閒刁斗天山擁  
節旄岱嵩何落落江漢自滔滔天寶珠仍壁長城雉與

壕崇牙分榮戟大壤屬韃橐日月依龍德風雲挾豹韜  
夾山羣戰騎黑水泳輕舠落日觀魚浦秋風射雉臯化  
行家置塾後簡里停磬歌奏投壺室文閒治獄曹西菴  
談性理東閣會奇髦森爽開璜琥縱橫列鴈羔禮容新  
泮宇物性遂莊濠牧唱聞朝起樵音聽暮號孤嬰收坎  
阱流滯起蓬蒿屢下陳蕃榻誰空北海醪卻軍敦禮樂  
曹館富風騷客望龍門聚雛從鳳穴翱世知三窟隘人  
可二天逃雨露承恩命山河襲世勞功名高衛霍輔弼

慕伊咎鞍馬憐髀肉簪纓視鬚毛雅申張仲德頌入魯  
侯昭有客傷淪落無階寫鬱陶太行雲幕幕代北雨淩  
淩去國心將折懷人首獨搔身如伏櫪驥情似失林猱  
涸轍將安往窮途况所遭幸今逢匠石直欲啖醪糟忖  
已誠無有登門亦已叨沐薰良備至感激欲號咷已客  
馮驩舍猶傷范叔袍鐔須開匣劍割欲試鉛刀杞梓容  
山木包羞薦沼茅每思休困頓佳蔭有蘭皋

七言長律

鄭輝

潞公軒即席繼和劉巨濟秀才韻

萬壑奔騰匯一灣，構堂其上稱吟觀。  
欲同鄴令投巫近，肯作陶軒容膝安。  
心靜自當憑棐几，氣清不必飾雕欄。  
徒誇海上蓬瀛遠，始覺壺中天地寬。  
山勢東南插雲碧，

人家高下似星攢。  
擬追潞國優哉樂，

此中父老言潞公宰此邑優游自樂

殊不以簿書介意

盍念清河作署難

縣署皆張仲溫所修

繁暑遠人如酷

吏清涼生腋，勝仙丹沿流花圃真堪賞。  
解愠絲絃誰復

彈窗轉雄風來坐上雨踈雌霓挂林端休思酒社凋零

半

余與前令尹王公美屢會於此今則無復舊日矣

且作詩人冷淡歡我輩三

年窮勝趣此中五月亦輕寒民安訟隙無餘事醉卧真  
須向夜闌

五言絕句

蔡松年

庚戌九日還自上都飲酒於西巖以野水竹間

清秋巖酒中綠為韻十首

雞羣媚稻粱老鶴日踈野人言隨其流故有不同者  
骨相乃封侯銅腥能使鬼文章亦可憐不直一杯水  
在昔安九鼎功名照帛竹貞觀用元成一士天下足  
憂國在肉食斂玉莪清班吾曹漫浪人合眼松雲間  
閒居度重九昔賢愛嘉名霜菊有正色糟牀逢聖清  
平生一丘壑晚隨法家流一點無俗物今年真好秋  
謝公既經世永懷東西巖翠袖亂清光輕雲點風鬟  
我得秋風暇鱸魚一杯酒佳人發浩歌此樂當不朽



去年哦新詩小山黃菊中年年說秋思遠目驚高鴻  
韙哉生處樂陵谷異風俗南枝吾永安笑撫西巖綠

虞仲文

雪花

四歲作

瓊英與玉蘂片片落前池問著花來處東君也不知

張斛

夜雨南山

雨夜宿山齋夜深雨聲息石室含餘清風枝墮殘滴

還家

雲林無俗姿相對可終老如何塵中人不見青山好

姚孝錫

芍藥

綠萼披風瘦紅苞浥露肥只愁春夢斷化作彩雲飛

芭蕉

鳳翅搖寒碧虛庭暑不侵何因有恨事常抱未舒心

蜀葵

傾心知向日布葉解承陰空側黃金盞誰人與對斟

劉汲

留別四弟

對牀喜清夜尊酒話平生自是今宵雨於人却有情

酒中作

樹暗春將老酒闌人欲歸徘徊風月夜花絮一簾飛

任詢

憶郎山

萬壑溪流合千峰木葉黃郎山五千丈獨立見蒼蒼

高有鄰

驪山

不見朝元閣難尋羯鼓樓繁華隨世去惟有渭川流

王庭筠

絕句

竹影和詩瘦梅花入夢香可憐今夜月不肯下西廂

孫氏午溝橋亭

閒來橋北行偶過橋南去寂莫獨歸時沙鷗晚無數

憶澗川

極目江湖雨連陰甲子秋青燈十年夢白髮一扁舟

法華臺

塊北有同色雪深雲未開終南晴夜月彷彿似登臺

道材

樓閣明丹堊松杉振老髯僧迎方擁帚茶細旋探簷

題馬光塵畫

珠璧佳城下丹青敗葉間殘年兩行淚絕筆數重山

趙渢

聚遠堂

獨上平臺上風雲萬里來青山一尊酒落日未能回

劉昂

山堂

山雨溪邊過山堂夜獨吟悠悠松上月照見壁間琴

周昂

北行即事

聞道崑崙北風塵避僕窪至今悲漢節不合渡流沙  
五月分衣節三軍受甲時莫教麟閣將頻發羽林兒  
高汝礪

雨後

時雨雨三日田家家萬金有年天子慶憂國老臣心  
趙秉文

和韋蘇州西塞山

龍門

雙闕聳岩堯神斧忽中斷一水從中來千龕道傍滿  
和韋蘇州秋齋獨宿

冷暈侵殘燭雨聲在深竹驚鳥時一鳴寒枝不成宿  
和韋蘇州西樓

十去龍沙鴈年年久不歸煙塵猶未息莫近塞雲飛  
河上

築堰分泉脉開溝斷荻芽風期占月暈水信識桃花  
早愛瀕河麥晴憐喚雨鳩春隨挑菜侶月趁捕魚舟



連雪潮退

夕陽明島寺海氣入邊城  
潮落青魚出泥深白鳥行

郎山雜詠

天城

造化搏清氣秀出天城山  
青松伴僧老白雲如我閒

馬耳峰

房駟落人間入石露雙碧  
月明聞夜嘶驚落山頭石

摩雲峰

青山本無情白雲自來往身在浮雲中仰看浮雲上

鬱秀峰

道人西澗來衣上南山雨心知石堂煙晴峰正堪數

泓雲泉

藹藹春雲滋巖溜滴泉乳獨留一泓碧去作人間雨

上龍門

南北兩石門上下一靈鷲仰看蓮峰立忽見天門透

下龍門

亂峰排鳥道一水會龍門禹力不到處猶知滄海尊

奉命奏告山陵四首

祇命歟園陵俶裝事行役黃葉宿幾程青山館三日  
西山積翠氣空外摩青天飛筇不到處獨鳥衝寒煙  
山前紅樹合山頂白雲封山中有蘭若日暮聞疎鐘  
山月出未高林深鳥猶夢霜落人未知寒添覺聲重

遊崆峒四絕

青龍洞

青龍不可見雲自洞中出為雨濟人間歸時杳無跡

仙人橋

絕澗初無路通仙忽有橋偶攜青竹杖平步到雲霄

翠屏山

山作屏風樣其如空翠何不遮秋塞盡空障夕陽多

參雲亭

鳥語山更靜松聲風自寒不嫌雲氣濕來此凭欄干

張穀

與李屏山飲燕市

日日飲燕市人人識張翥西山晚來好飲酒不下驢

李適

江邨

陸地無根客江邨有髮僧兩盂殘喘粥一寸苦吟燈

張櫟

永寧劉氏園亭

菊老芙蓉衰梨柿葉爭絳叩門人不應一犬吠深巷

梁仲新

江天暮雪圖

南雪不到地  
霏霏滿竹樓  
沙河燈市裏  
春在木棉裘

張建

山中

林櫻墮紅珠  
打著琴上絃  
山人時一笑  
愛此聲琅然

雜詩二首

瓦竝擔山泉  
石鼎煮巖菊  
燎以松桂枝  
清芬滿茅屋

踏雪尋梅花雪梅同一色不是暗香來梅花尋不得

董文甫

絕句

白髮三千丈紅塵六十年只今無見在虛費草屨錢

元德明

尊酒

土灰論遠計木石笑浮生但有一尊酒何須千載名

憶山中二絕句

東寺留連飲張園爛熳遊兒童望歸路一日幾登樓  
秋色山中好山翁醉不迴不知籬下菊霜後幾叢開  
山中雨後

遶屋湍聲轉臨崖老樹摧雷轟一雨去雲劈兩山開  
歲暮

簌簌霜力勁沈沈山氣冥北風半夜起吹動一天星  
白君舉

題靖節圖



咄哉靈運輩危坐衣冠辱何如五柳家春雨東臯綠

李經

鴈奴

鴈奴失寒更拍拍叫秋水天長夢已盡秋思紛難理

雜詩

長河老秋凍馬怯冰未牢河山吟鞭底日暮風更號  
晨井凍不爨誰療壯士飢天廐玉山禾不救我馬殫

雷淵

題黃華江皋煙樹

疎柳靜茅亭亭下長江路不見亭中人蕭蕭煙景暮

梅澤

望終南山

明月一尊酒清風萬卷書南山山下路終欲卜鄰居

雷發

詠松菴

菴中偃卧龍閱世鬚髯古天人共護持半夜起風雨

劉昂霄

同敬之裕之游水谷分韻賦詩得荷風送香氣  
五字

招提有勝踐日暮一經過何物媚遊人微風動池荷  
尋幽意自愜况與佳人同俗物不到眼談笑來天風  
敲門看脩竹重理舊年夢上山復下山清風管迎送  
寒泉漱雲根湛然涵鏡光誰知一滴味中有曹溪香  
迂辛與臞元得句猶有味顏垣斂暝色深竹貯秋氣  
色暝

敬之句秋氣  
裕之句也

王利賓

題扇頭

輕紗畫竹雀柄短不盈握暑氣正憑陵清風一何邈

烏林噀爽

鄴硯

上有丹錫花秋河碎星斗磨研清且厲玉瑟鳴風帚

王賓

舟中

河伯夸秋漲舟人健晚涼櫓聲搖落月山氣鬱蒼蒼

李俊民

一字題示商君祥

并序

錄二十八首

余年三十有九遭甲戌之變乙亥秋七月南邁時  
姪謙甫主河南福昌簿迎至西山僑居廳事之東  
齋小學師商君祥投詩索和頃刻間投詩數十紙  
謙甫曰一鼓作氣未可敵姑堅壘以待姪婿郭鴻

漸曰可以單師挫其銳乃出百字題請賦以酬之  
遂信筆而書殊無意義付其徒孫男樂山示之三  
日不報謙甫笑曰五言長城不復敢攻也君祥於  
是攜酒來乞盟大會所友極歡而罷

雲

旱魃將為虐從龍便出山人間三尺雨命駕早知還  
雨

晚有來蘇意憂深望歲人一犁雖美滿猶恨不當春

雪

細看花是雨將見麥宜秋度臘無三白梁園誰與游

山

功名雙鬢雪心事數重山山下人家好終朝爽氣間

塵

不憂懸榻室可奈汙人風踏破青鞵底猶疑是軟紅

春

來莫愁春遲去莫怨春忙春不隨人老誰教汝斷腸

菊

色笑秋光淡香嫌酒力慳東籬在何處客裏見南山

梅

未報江南信先開雪裏邨要看花上月立馬待黃昏

松

鬱鬱愁無地青青獨有心疑從大夫後傾蓋到如今

蜂

弄晴沾落絮帶雨護園花有課常輸蜜無春不到衙



僧

貌與松俱瘦心將絮共沾一菴空寂地香火讀楞嚴

漁

一聲歌欸乃萬頃國煙波鰲蟹中間醉蓑衣拜浪婆

樵

雲外山將遍人間日易斜不知棊換世柯爛未還家

書

入室五千卷揀架三萬軸何似曬書人坦此便便腹

硯

端溪溫潤石價重百車渠一滴元潭水蠅頭萬卷書

琴

陰壑鳴松籟空巖響石泉此聲並此意誰得寄徽絃

香

小炷博山鼎半殘心字灰游蜂何處客應為百花來

隱

孔負二宜去嵇知七不堪青山休老地佳處是終南

壽

灰如戀闕心雪似窮經首問年今幾何看飲屠酥酒

行

水笑杯猶渡山驚錫尚飛垂垂瓶鉢老何處未來歸

住

俗尚家靈運誰堪社遠公空山雲不出愁殺渡溪風

飲

竹葉杯中綠金釵坐上春淺斟低唱境猶道是麤人

舞

野鶴聞琴態孤驚  
覽鏡妍為君小垂手  
無地可回旋

嘯

成堦風生坐孫登  
月滿臺東臯今寂  
莫元亮早歸來

別

更盡一杯酒出門  
行路難送君過南浦  
忍淚凭闌干

愁

解使回腸斷能催兩鬢秋  
天涯未歸客容易上眉頭

炊

旅食寄天涯愁如桂玉何莫忘生處樂聽取廢序歌

砧

對影無情石關心寄遠衣天涯鎮長客鴈後不懷歸

避亂

雪巖依日煖霜樹弄風悲山似王維畫人如杜甫詩

十六日夜戲書

貪作梅花夢都忘柳絮禪可憐人與月不似夜來圓

九日答朱壽之

與客登高處節物傷遲暮不見白衣來三復秋風句

蝶

轉首一場夢驚心三月春揚揚枝上蝶不見惜花人

元好問

洛陽高少府瀍陽後菴五首

溪上弄明月風露發新警心空無一塵萬竹埽清影  
一水隨人意蔬畦復芋溝風波河洛近莫放出山流

非早春先綠  
崧肥秋未黃  
殷勤繞畦水  
終日為君忙  
地僻境逾靜  
林疎秋已分  
清溪一片月  
脩竹四山雲  
方外人長樂  
山中物自幽  
百年梅福隱  
萬古謫仙游  
南樓月夕望  
鳳山有懷武  
鍊師子和

相望不相見  
山中君得知  
南樓今夜月  
也到洗參池

山中晚春

雲光金碧聚  
林煙綵翠新  
山花發較晚  
今年兩見春

山居雜詩六首

瘦竹藤斜挂叢花草亂生林高風有態苔滑水無聲  
石潤雲先動橋平水漸過野陰添晚重山意向秋多  
樹合秋聲滿邨荒暮景閒虹收仍白雨雲動忽青山  
川迴楓林散山深竹港幽疏煙沈去鳥落日送歸牛  
漲落沙痕出堤摧岸口斜斷橋堆聚沫高樹閣浮槎  
鷺影兼秋靜蟬聲帶晚涼陂長留積水川闊盡斜陽  
得緯文兄書

鵲語喜復喜山城誰與娛青燈一杯酒千里故人書



乙巳九月二十八日作

關山小雪後絮帽北風前殘月如新月今年老去年

梁父吟扇頭

孔明箕踞坐大石上望月作梁父吟

盤礴萬古心塊石入危坐青天一明月孤唱與誰和

辛亥寒食

寒食年年好今年迴不同秋千與花影并在月明中

陳賡

蒲中八詠為師品卿賦

錄六首

蒲津晚渡

雲濤注壺口水府播九壘公子莫爭舟蛟龍方翫翫  
虞坂曉行

伯樂沈九源泥塗困騏驥千古長坂空無人知此意  
首陽晴雪

天風吹瓊瑤白冒首陽頂欲和採薇歌千山凍雲冷  
東林夜雨

林壑冷含秋風雨黯如海何如贊公房清燈淡相對

西巖疊嶽

梵刹盤空曲煙霞錦繡文山靈儻招隱徑入萬重雲

王官飛湍

懸流落雲巖遙空挂飛練何時斟酌清冷一潁紅塵面

段克已

九日山園小宴取五柳公采菊東籬下為韻賦

詩侑觴

世無李元禮誰容孔北海長歌歸去來籬菊無人采

古來賢哲人餓死填空谷清杯幸不空且醉籬邊菊  
風雨山城暮黃華自滿叢幽懷若為寫正要玉西東  
愛酒陶元亮持杯對菊枝醉時推客去猶復有籬籬  
飢餐秋菊英采采不盈把日落四山昏獨坐衡門下

王嘉

清涼

清涼何所似不與苦寒同半夜臨潭月初秋過雨風

張秦娥

南城

坡頭望西山秋意已如許雲影渡江來霏霏半空雨

麗澤

長吟伐木詩停立以望子曰暮飛鳥歸門前長春水

采菱舟

散策下松亭水清魚可數却上采菱舟乘風過南浦

遠山

秋水一林碧殘霞幾點紅水窮霞盡處隱隱兩三峰



御選金詩卷十七